


資治通鑑綱目三編

三四

完



漢書門			
五	〇	七	九
冊	架	函	號

內閣文庫			
八	五	五	漢
〇	七	九	書
冊	架	函	號

內閣文庫		
番號	漢	5079
冊數	8	(2)
函號	285	21



御撰資治通鑑綱目三編卷三

起丁卯明太祖洪武二十年盡  
戊寅明太祖洪武三十一年

凡十二年 文庫

丁卯

二十年春正月以馮勝為征虜大將軍率師討納哈出

元太尉納哈出擁眾數十萬屯金山數寇遼東帝以勝

為大將軍傅友德藍玉為副率師二十萬討之遣前所

獲元將乃剌吾還軍次通州聞元兵有屯慶州者藍玉

乘大雪師輕騎襲破之斬平章果來禽其子不蘭奚勝

出松亭關分築大寧寬河會州富峪四城駐兵大寧

焚錦衣衛刑具

先是有罪囚逮至京收繫錦衣衛用事者非法凌虐帝

聞之怒命取刑具悉焚之出繫囚送刑部詔內外獄咸

歸三法司

夏六月。馮勝至金山。納哈出降。

乃刺吾歸見納哈出。述帝恩德。納哈出心動。遣使求獻馬。且覘軍勢。勝軍踰金山降。其部將全國公觀童。納哈出度不敵。因乃刺吾請降。勝遣藍玉往受之。納哈出以數百騎至。王大喜。飲以酒。納哈出酌酒酬玉。玉解衣衣之。納哈出不肯服。玉亦不飲。爭讓久之。納哈出取酒澆地。顧其下。咄咄語。鄭國公常茂在坐。其麾下有解蒙古語者。密告茂。納哈出將遁矣。茂直前搏之。納哈出驚起。欲就馬。茂拔刀斫傷其臂。都督耿忠擁以見勝。納哈出將士十餘萬在松花河北。聞納哈出傷。驚潰。勝遣觀童

諭降之。得所部二十餘萬人。還至亦迷河。復收其殘卒三萬。而餘眾竄匿者尚數萬。都督濮英殿大軍還。猝爲所乘。被執。引佩刀刺腹死。納哈出至京師。詔封海西侯。秋八月。召馮勝還。詔副將軍藍玉領其軍。

勝奏常茂激變狀。械至闕。會有言勝多匿良馬使鬪者。行酒於納哈出妻。求大珠異寶。王子死。且強娶其女。失降附心。而茂亦許勝過。帝怒。收勝大將軍印。命就第。鳳陽奉朝請而安置茂於龍州。

九月。詔商稅毋定額。

戶部言。天下稅課。視舊有虧。宜以洪武十八年所收爲定額。帝曰。商稅多寡。歲有不同。限以定額。豈不病民。不

從。以藍玉爲大將軍。帥師北伐。○冬十一月。命湯和築瀕海城備倭。

日本屢入寇。帝患之。謂和曰。卿雖老。強爲朕一行。和請與方鳴謙俱。鳴謙。國珍從子也。習海事。帝訪以禦倭策。鳴謙曰。倭海上來。則海上禦之。耳。請量地遠近。置衛所。陸聚步兵。水具戰艦。若壘錯置。其間則倭不得入。入亦不得傳岨。近海民。四丁籍一爲兵。無煩客兵也。帝以爲然。和乃度地。浙東西置衛所。並海築城五十有九。選丁壯五萬八千餘人戍之。

二十一年春正月。詔治有司匿災者罪。

青州饑。有司匿不以聞。詔逮治之。且著爲令。

三月。沐英討思倫發。破走之。

思倫發寇定邊。衆號三十萬。英選騎三萬馳救。置火礮勁弩爲三行。蠻毆百象。被甲翼以標槍。銳甚。英分軍爲三。都督馮誠居前。都督同知寧正左。湯昭右。英與將士約。有功者賞。退。勦者斬。因乘風大呼。礮弩並發。象皆反走。賊殊死鬪。左軍少却。英登高望之。取佩刀。命左右斬帥首來。左帥見一人。握刀馳下。恐奮呼衝突。大軍乘之。斬敵四萬餘。生獲象三十七。賊帥各被百餘矢。伏象背死。思倫發遁去。明年遣使入貢。麓川平緬遂平。

夏四月。藍玉襲破元脫古思帖木兒於捕魚兒海。獲其子。

地保奴。

玉以大軍出大寧。至慶州。聞脫古思帖木兒在捕魚兒海。間道馳進。至百眼井。不見敵。玉欲還。定遠侯王弼曰。吾等提十萬衆深入至此。無所得。何以復命。玉曰。然。令軍士穴地而鑿。毋見烟火。乘夜馳至捕魚兒海。黎明。去敵營八十餘里。時大風揚沙。晝晦。軍行無知者。敵不設備。弼爲前鋒。大破之。斬太尉蠻子等。降其衆。脫古思帖木兒以其太子天保奴等數十騎遁。獲其次子地保奴及妃主以下百餘人。官屬三千。男女七萬。馬騾牛羊十五萬。奏捷京師。帝大悅。遣使齎勅勞玉。比之衛青。李靖云。

五月朔日食。○六月。信國公湯和歸鳳陽。

帝春秋浸高。不欲諸將久典兵。未有以發也。和以間從容乞骸骨。帝大悅。賜鈔治第鳳陽。並爲諸公侯治第。至是第成。和築城海上。還。率妻子陛辭。帝褒諭之。賜賚甚厚。

秋七月。以解縉爲監察御史。

縉爲中書庶吉士。甚見愛重。一日。帝諭之曰。朕與爾義則君臣。恩猶父子。當知無不言。縉卽曰。上封事萬言。略曰。臣聞合數改則民疑。刑太繁則民玩。國初至今。將三十載。無幾時不變之法。無一日無過之人。臣聞陛下鋤根剪蔓。誅其姦逆矣。未聞褒一大善。始終勿替者也。或

朝賞而暮戮。或忽罪而忽赦。陛下每多自悔之時。此由存養之功。少加密耳。若夫祀天宜復掃地之規。尊祖宜備七廟之制。奉天不宜爲筵宴之所。文淵猶未備館閣之隆。太常非俗樂可肄。官妓非人道所爲。禁絕倡優。易置寺閣。執戟捍陛。皆用俊良。勿與土木之工。勿貪四裔之地。減細縣。省冗官。痛懲法外威刑。永革京城工役。婦女非帷薄不修。毋合逮繫。大臣有過。惡當誅。不宜加辱。近歲臺綱不肅。以刑名輕重爲能事。以問囚多寡爲勲勞。御史糾彈。皆承密旨。每聞上有赦宥。則必過爲執持。意謂如此。則上恩愈重。此皆小人趨媚効勞之細術。陛下何不肝膽而鏡照之哉。陛下進人不擇於賢否。授職不量於輕重。惟埋器悍之夫。闕茸下愚之輩。朝捐刀鐮。暮擁冠裳。左棄篋篋。右縮組符。雖曰立賢無方。亦盍忱詢有德。古者善惡鄉鄰必記。今互知之法雖嚴。而訓告之方未備。臣欲求古人治家睦鄰之法。若古藍田呂氏鄉約。今義門鄭氏家範。布之天下。世臣大族。率先以勸。將見作新於變。至於比屋可封。不難矣。臣聞地有盛衰。物有盈虛。而商稅之徵。率皆定額。既稅於所產之地。又稅於所過之津。何奪民之利如此密也。且多貧下之家。逃亡轉徙。無前日之生植。有前日之稅糧。或膏腴而稅反輕。瘠鹵而稅反重。此里胥之弊也。欲拯困而革弊。莫若行授田均田之法。兼常平義倉之舉。積之以漸。至有

九年之食無難者。夫連坐起於秦法。孛戮本於偽書。今爲善者妻子未必蒙榮。有過者里胥已陷其罪。况律以人倫爲重。而有給配婦女之條。聽之於不義。則又何取。夫節義哉。同寅協恭。相倡以禮。今內外百司。捶楚屬官。甚於奴隸。是使柔懦之徒。蕩無廉恥。甚非所以勵風節也。臣但知罄竭愚衷。急於陳獻。所奏略無次序。惟陛下垂鑒。書奏。帝稱其才。尋改爲御史。

九月。勅天下衛所屯田。

歲得糧五百餘萬石。

冬十月。元脫古思帖木兒爲其下所殺。

脫古思帖木兒既逝。將依丞相安任於和林。行至土刺河。爲其下也速迭兒所襲。衆遂散。獨與十六騎俱咬住來迎。欲共往。依闊帖木兒會大雪不得發也。速迭兒兵猝至。搃殺之。并殺天保奴。自脫古思帖木兒五傳至坤帖木兒。咸被弑。不復知帝號。有鬼力赤者。篡立。稱可汗。去國號。遂稱鞏帖云。

十二月。安南黎季犛廢其王煒。尋弑之。

陳叔明立三歲。傳其弟端。端死。弟煒代立。其相季犛竊柄廢煒。殺之。立叔明子日焜。主國事。

二十二年。春二月。禁武臣預民事。○湖廣千戶夏得忠作亂。靖寧侯葉昇討之。得忠伏誅。

得忠誘九溪洞蠻爲寇。昇同胡海等討之。潛兵出賊後。

掩擊擒得忠斬之置九溪永定二衛。

夏五月置泰寧朶顏福餘三衛。

三衛地爲兀良哈在黑龍江南元大寧路北境元遼王等內附帝卽其地置三衛俾部長各領其衆互爲聲援自錦義歷廣寧至遼河曰泰寧自全寧抵喜峰口近宣府曰朶顏自黃泥窪逾瀋陽鐵嶺至開原曰福餘獨朶顏地險而強。

秋九月朔日食。

甲辰

二十三年春正月命晉王櫛燕王棣帥師北伐。

命傅友德等以北平兵從燕王王弼等以山西兵從晉王征咬住及乃兒不花。

河決歸德。

決歸德東南鳳池口徑夏邑永城諸縣發十衛士卒與歸德民并力築之及秋又決開封。

三月燕王棣至迤都元太尉乃兒不花等降。

棣出古北口偵知乃兒不花營迤都冒大雪馳進去敵一磧先遣指揮觀童往觀童故善乃兒不花至則相持泣頃之大軍壓其營乃兒不花驚欲遁觀童止之引見棣賜酒食慰諭遣還乃兒不花喜過望遂偕咬住等來降二十五年命元降軍赴北平聽燕王調用棣兵自此益強。

夏四月潭王梓自焚死。

明太祖洪武二十三年

七

七



梓英敏好學。嘗會府僚設醴賦詩。品其高下。而賚予之。妃於氏。都督顯女也。顯與子琥。坐胡惟庸黨。誅。梓不自安。帝遣使召之。大懼。與其妃自焚死。

閏月。詔期服不得奔喪。

初。百官聞祖父母伯叔兄弟喪。俱奔赴。吏部言。一人或連遭五六期服。或道路數千。則居官日少。更易繁數。曠官廢事。莫此爲甚。請自今。期年服不許奔喪。從之。

五月。以楊靖爲刑部尙書。

靖鞠一武弁。門卒檢其身。得大珠。僚屬驚異。靖徐曰。僞也。安有珠大如此者。立碎之。帝聞。歎曰。靖此舉。有四善焉。不獻朕以求容悅。一也。不究其所投獻。息大獄。二也。

不獎門卒。杜小人僥倖。三也。千金之珠。猝然至前。斥以爲僞而碎之。有過人之智。應變之才。四也。

賜韓國公李善長死。

先是善長弟存義。安置崇明。善長不謝。帝銜之。至是善長年七十七。毫不檢下。嘗欲營第。從信國公湯和假衛卒三百人。和以聞。四月。京民坐罪。應徙邊。善長數請免。其私親丁斌等。帝怒。按斌。斌故給事。胡惟庸家。因言存義等往時交通。惟庸狀。命逮存義。鞠之。詞連善長。於是御史交章劾善長。坐以大逆。會星變。言者謂其占當移大臣。遂賜善長死。并殺其家屬七十餘人。子祺尙臨安公主。免死。徙江浦。吉安侯陸仲亨。延安侯唐勝宗。平涼

侯費聚南雄侯趙庸河南侯陸聚宜春侯黃彬豫章侯  
胡美榮陽侯鄭遇春等皆同時坐惟庸黨死帝條列其  
罪作姦黨錄布告天下既而虞部郎中王國用上言善  
長與陛下同心出萬死以取天下勲臣第一生封公死  
封王男尚公主親戚拜官人臣之分極矣藉令欲自圖  
不軌尙未可知而今謂其欲佐胡惟庸使善長佐惟庸  
事成不過勲臣第一而已寧復有加於今日且善長豈  
不知天下之不可倖取當元之季欲爲此者何限莫不  
身爲齏粉覆宗絕祀善長胡乃以衰倦之年身蹈之也  
凡爲此者必有深讐急變大不得已或至相挾以求脫  
禍今善長子祺托陛下骨肉親無纖芥嫌何苦而忽爲

此若謂天象告變大臣當災殺之以應天象則尤不可  
臣恐天下聞之謂功如善長且如此四方因之解體也  
臣亦知善長已死言之無益願陛下作戒將來耳

秋八月詔毋以吏卒充選舉○九月朔日食○冬十二月  
罷天下歲織文綺

未辛

二十四年春三月朔日食○夏四月封子十人爲王

榘爲慶王權寧王榘岷王榘谷王松韓王模濬王楹安  
王桎唐王棟郢王榘伊王

秋八月命皇太子巡撫陝西○冬十月以馮堅爲僉都御  
史

堅南豐縣典史上書言九事一曰養聖躬清心省事以

爲民社之福。一曰擇老成輔導諸王。使正色直言以圖匡救。三曰務農講武。屯戍邊圉。以備不虞。四曰精選有司。旌別屬夷。使人勇於自治。五曰褒祀典。俾末俗有所興勸。六曰省宦寺。以防內權。七曰調易邊將。以防外患。八曰採廉能以懲貪墨。九曰增關防。以革奸弊。書奏。帝嘉之。稱其知時務。達事變。又謂侍臣曰。堅言調易邊將。則未然。邊將數易。則兵力勇怯。敵情出沒。山川形勢。無以備知。倘得趙充國。班超者。又何以數易爲哉。乃擢堅僉都御史。

十一月。皇太子還京師。

二十五年春正月。河決陽武。

旁侵十一州縣。

夏四月。皇太子標卒。

諡懿文。帝御東角門。召對廷臣。慟哭。學士劉三吾進曰。皇孫正嫡承統。禮也。帝意遂決。

建昌衛指揮使月魯帖木兒叛。命藍玉討誅之。

月魯帖木兒。合德昌。會川。諸番。攻建昌。轉攻蘇州。玉遣四川指揮瞿能討之。至雙狼寨。擒其將。賊衆大潰。月魯遁。能督兵追捕。進至打冲河。又敗之。月魯走栢興州。玉遣百戶毛海誘縛其父子。送京師誅之。盡降其衆。

六月。西平侯沐英卒。

英沉毅寡言笑。好賢禮士。撫卒伍有恩。未嘗妄殺。在海

百務具舉。簡守令。課農桑。墾屯田百餘萬畝。滇池隘。凌而廣之。通鹽井之利。以來商旅。疎節闕目。民以便安。帝嘗曰。使吾高枕無南顧憂者。英之功也。卒。追封黔寧王。謚昭靖。子春茂。昂相繼鎮雲南。

秋七月。高麗李成桂。逐其君瑠而自立。

初。王禍欲寇遼東。使成桂繕兵。成桂遣兵屯艾州。以糧不繼而退。禍怒。殺成桂之子。成桂還兵攻之。囚禍。立其子昌。未幾。又廢昌而立瑠。至是。遂逐瑠而自立。瑠出居原州。王氏自五代傳國數百年。至是絕。是冬。成桂請更國號。帝命仍舊號曰朝鮮。

九月。立孫允燧為皇太孫。○以方孝孺為漢中教授。

孝孺少好學。恒以明王道致太平為己任。十五年。以吳沉薦召見。帝喜其舉。止端整。謂太子曰。此莊士。當老其才。禮遣還。至是。又以薦召至。帝曰。今非用孝孺時。除漢中教授。蜀王椿聞其賢。聘為世子師。名其讀書之廬曰正學。

冬十二月。徵安陸知州余彥誠下吏。尋釋之。

彥誠以徵稅愆期。逮。州民楊么等伏闕乞留。帝賜宴。遣還。么等亦預宴。時帝操重典。繩羣下。守令坐小過輒逮繫。其部民走闕下乞留。旋遣還。且加賞賚。有因以超擢者。

癸酉 二十六年春二月。涼國公藍玉以罪誅。

王有勇略。數總大軍。多立功。帝遇之厚。寔驕蹇。自恣。多畜莊奴。假子。乘勢漁獵。嘗占東昌民田。御史按問。王捭逐御史。北征還。夜扣喜峰關。關吏不即納。王縱兵毀關入。帝聞之不樂。又有言其私元主妃者。帝切責王。王猶不悛。及西征歸。兼太子太傅。而馮勝傅友德俱兼太子太師。王攘袂大言曰。我固不當爲太師耶。比奏事多不聽。益怏怏。錦衣衛指揮蔣瓛。告王謀反。廷鞫之。獄詞云。王與鶴慶侯張翼。普定侯陳桓。景川侯曹震。舳艫侯朱壽。東莞伯何榮。及吏部尙書詹徽。戶部侍郎傅友文等。謀爲變。將伺帝出。藉田舉事。獄具。族誅之。列侯以下坐黨夷滅者。萬五千人。于是元功宿將。相繼盡矣。

三月。命晉王櫛。燕王棖。節制出西北平軍事。

詔二王軍中事大者。方以聞。宋國公馮勝。潁國公傅友德。並受節制。

夏四月。詔有司賑饑。毋俟報。○旱。詔羣臣言事。理獄囚。○秋七月朔。日食。○九月。以鄭濟爲左庶子。王勳爲右庶子。初。東宮官屬缺。命廷臣舉孝義篤行之士。尙書嚴震直以浦江鄭氏對。帝曰。朕素知鄭。更聞其里王氏。力行鄭氏家法。可用以勵天下。濟勳遂並拜官。

戶部奏是歲天下戶口之數。

戶一千六百五萬二千八百六十口。六千五十四萬五千八百十二。

戊甲

二十七年秋八月遣使修天下水利。帝諭工部陂塘湖堰可蓄洩以備旱澇者皆因地勢修治之乃分遣國子生遍詣天下督修水利凡開塘堰四萬九百八十七處。

冬十一月賜賴國公傅友德死。

友德身冒百死自偏裨至大將每戰必先士卒以故所至立功二十五年友德請懷遠田千畝帝不悅曰祿賜不薄矣復侵民利何居爾不聞公儀休事耶及是竟賜死未幾定遠侯王弼亦賜死。

二十八年春正月西平侯沐春討越州蠻平之。

越州蠻阿資恃險屢叛春與都督何福率師營越州城

夏乙

北伏精兵道左以羸卒誘賊賊悉眾出伏起大敗之阿資亡山谷中春謂知所在樹壘斷其糧道已出不意擣其巢遂擒阿資斬之俘其黨越州平。

二月賜宋國公馮勝死。

帝春秋高多猜忌勝功最多數以細故失帝意遂賜死諸子皆不得嗣。

秋八月信國公湯和卒。

和晚年益為恭慎入聞國論一語不敢外泄媵妾百餘病後悉資遣之所得賞賜多分遺鄉曲當時公侯諸宿將坐奸黨先後麗法稀得免者而和獨享壽考以功名終卒年七十追封東甌王謚襄武。

九月。頒皇明祖訓。

詔後世有言更祖制者。以姦臣論。

子丙

二十九年。春二月。燕王棣帥師巡邊。三月。敗元兵於徹徹兒山。又追敗之於兀良哈禿城而還。○秋八月。殺監察御史王朴。

朴性鯁直。數與帝辨是非。帝怒。命戮之。及市。召還諭曰。汝其改乎。對曰。陛下不以臣為不肖。擢官御史。奈何摧辱至此。使臣無罪。安得戮之。有罪。又安用生之。臣今日願速死耳。帝大怒。趣命行刑。過史館。大呼曰。學士劉三吾志之。某年某月日。皇帝殺無罪御史朴也。竟戮死。三十年。夏五月朔。日食。○秋八月。河縣吏高福興作亂。征

丑丁

西將軍耿炳文討誅之。○九月。平緬蠻。刀幹孟逐其宣慰使思倫發。詔沐春討之。

刀幹孟攻騰衝。思倫發走雲南。帝命春與何福等討之。先以兵送思倫發於金齒。檄幹孟來迎。不應。乃遣何福等將兵五千。踰高良公山。直擣南甸。大破之。斬其酋刀名孟。回軍擊景罕寨。賊憑高堅守。官兵糧且盡。福告急。春帥五百騎救之。乘夜渡潞江。連破二寨。幹孟乞降。帝不許。

寅戊

三十一年。夏閏五月。帝崩。太孫允炆即位。○葬孝陵。○六月。詔省州縣。汰冗員。○戶部侍郎卓敬請徙封燕王棣於南昌。不聽。

敬密疏言燕王智慮絕人。酷類先帝。北平形勝地。士馬精強。金元所由興。宜徙封南昌。萬一有變。亦易控制。奏入。翌日召問。敬叩頭曰。臣所言。天下至計。願陛下察之。事竟寢。

召方孝孺為翰林院侍講。

帝好讀書。每有疑。即召孝孺講解。臨朝奏事。臣僚面議可否。或命孝孺就展前批答之。

以齊泰為兵部尚書。黃子澄為太常卿。參預國事。

泰為兵部侍郎。太祖嘗問邊將姓名。泰歷數無遺。又問諸圖籍。出袖中手冊以進。簡要詳密。大奇之。子澄初為東宮伴讀。帝嘗坐東角門。謂曰。諸王尊屬。擁重兵。多不法。奈何。對曰。諸王護衛兵。僅足自守。倘有變。臨以六師。其誰能支。漢七國非不强。卒底滅亡。順逆之理。異也。帝即位。遂命泰與子澄同參國政。時燕周齊湘代岷諸王相煽動。流言聞於朝。帝謂子澄曰。先生憶昔東角門之言乎。對曰。不敢忘。

秋七月。周王橚有罪。廢為庶人。

齊泰與黃子澄謀。欲先圖燕。子澄曰。不然。周齊湘代岷諸王在先帝時。尚多不法。削之有名。今欲問罪。宜先周周燕之母弟。削周是剪燕手足也。謀定。入白帝。會有言周王橚不法者。遂命曹國公李景隆帥兵襲執之。竄蒙化。諸子皆別徙。已復召還京。銅之。



八月西平侯沐春卒於軍。

春在鎮七年。大修屯政。闢田三十餘萬畝。鑿鐵池河。灌宜良洞田數萬畝。民復業者五千餘戶。至是卒於軍。詔何福領其眾。

冬十月。熒惑守心。○十二月。賜天下明年田租之半。○都督何福擒刀幹孟斬之。

沐春既卒。賊復懷貳。福率兵討之。擒斬刀幹孟。思倫發始歸平緬。

以張昂為北平布政使。謝貴、張信為都指揮使。

時燕王稱疾不出。廷臣謀削燕。乃更遣守臣。使察其陰事。

卷三終

御撰資治通鑑綱目三編卷四

起己卯明惠帝建文元年。凡十一年。盡己丑明成祖永樂七年。

祀

恭閱惠皇帝建文元年。春二月。追尊皇考曰孝康皇帝。

廟號興宗。妣常氏曰孝康皇后。

尊母呂氏為皇太后。立皇后馬氏。立子文奎為皇太子。○

更定官制。

用方孝孺等議。內外品官階勲悉倣周禮。更定。又撰禮制。頒行天下。然無濟實事。徒為燕王藉口。

三月。京師地震。○夏四月。湘王柏自焚死。齊王榑代王桂有罪。廢為庶人。

有告湘王柏反者。遣使即訊。柏懼。闔宮焚死。會齊代皆

告變乃廢二王爲庶人。囚搏京師。幽桂大同。遣燕世子高熾及其弟高煦。高燧還北平。

太祖崩時。燕王棣遣三子入臨京師。高煦勇悍無賴。其舅徐輝祖切戒之不聽。至是棣稱病乞三子歸。齊泰欲遂收之。黃子澄曰。不若遣歸。使彼不疑。因遣還。棣喜曰。吾父子復得相聚。天贊我也。

六月。岷王梗有罪。廢爲庶人。○秋七月。燕王棣舉兵反。遣長興侯耿炳文討之。

先是。帝遣侍郎暴昭等充採訪使。分巡天下。昭至北平。得燕不法狀。密以聞。已而燕山衛百戶倪諒告變。帝下詔讓燕王。逮王府僚屬。北平都指揮使謝貴布政司張昺。部署軍士。列九門防守。都指揮張信。叛附於棣。棣密與僧道衍計。令張玉。朱能。潛納勇士八百人。入府守衛。會朝使至。棣僞縛官校置庭中。給貴昺入。執殺之。張玉等率勇士奪九門。燕府長史葛誠護衛指揮盧振。初皆與昺貴謀。誅棣。至是並遇害。夷其族。伴讀余逢辰死之。參政郭資。副使墨麟。僉事呂震並降棣。棣乃上書於朝。指齊泰。黃子澄爲奸臣。請入清君側。遂自署官屬。稱其兵曰靖難。尋陷薊州。奪居庸關。通州。遵化。永平。密雲。懷來。諸守將皆以城叛。帝下詔削燕王屬籍。以炳文爲征虜大將軍。駙馬都尉李堅。都督寧忠。副之。帥師討燕。尋命安陸侯吳傑。江陰侯吳高。都督耿璈。都指揮盛庸等。

分道並進設平燕布政使司於真定以暴昭掌之  
八月耿炳文及棣戰於滹沱河北敗績

炳文次真定使先鋒九千人駐雄縣值中秋大兵方宴  
會燕將張玉夜半疾驅襲陷之又陷鄭州炳文部將張  
保叛降於棣時大兵十三萬夾滹沱而軍棣欲與北軍  
戰懼南軍乘之乃縱保歸揚言燕王率兵且至誘炳文  
軍盡北渡河棣率張玉譚淵等夾擊炳文大敗喪師三  
萬副將李堅甯忠都督顧成皆被執炳文退保真定棣  
兵進圍之三日不克乃引去

召耿炳文還以李景隆代之

炳文敗黃子澄薦曹國公李景隆代之齊泰極言不可

帝不聽賜景隆通天犀帶親為推輪餞之江許景隆至  
德州收集炳文將卒并調諸路兵五十萬進營河間時  
吳高耿獻楊文方圍永平棣語諸將曰吾在此景隆必  
不敢進不若往援永平以致其師吳高怯不敢戰聞我  
至必走是我一舉解永平圍而破景隆也遂帥師援永  
平吳高盡棄輜重走退保山海關景隆知燕兵出果引  
軍趣北平直薄城下築壘九門燕世子高熾堅守不戰  
夜遣勇士縋城出斫營營中驚擾驟退都督瞿能攻張  
掖門垂克景隆忌之令候大軍同進燕人夜汲水沃城  
明日冰凝不得上

冬十月棣誘執寧王權奪其眾及朶顏三衛歸北平

權國大寧。大寧在喜峯口外，東連遼左，西接宣府，爲巨鎮。所屬朵顏三衛騎兵，皆驍勇善戰。燕兵起，朝廷慮權與燕合，召權及遼王植歸京師。權不至，坐削護衛。棣聞之喜，爲書貽權，至是以單騎入大寧，詭言窮蹙求救。執權手大慟，求代草表謝罪，而陰令吏士結三衛部長及諸戍卒，及辭去。權祖之郊外，伏兵起，擁權行。三衛驍騎及諸戍卒一呼畢集，守將朱鑑不能禦，力戰死。王府妃妾世子皆隨入松亭關，歸北平。棣以其衆分隸各軍，大寧城爲空。

十一月，李景隆及棣戰於鄭村壩，敗績，奔德州。

諸軍方圍北平，燕兵乘勝抵城下。城中兵鼓譟出，內外夾攻，諸軍皆潰。明年春，棣兵陷蔚州，攻大同，景隆自紫荊關赴援，燕兵已旋居庸，官軍多凍餒死者，不見敵而還。

罷兵部尙書齊泰、太常寺卿黃子澄。

棣以前所上書不報，再上書請去泰、子澄，帝爲罷二人，以謝燕，陰留之京師，仍叅密議。

庚辰二年春正月，均江浙田賦。

太祖初定田賦，怒蘇松嘉湖爲張士誠守，乃籍諸豪族及富民田以爲官田，按私租爲稅額，司農卿楊憲又以浙西地膏腴，增其賦，畝加二倍，故田賦之重，蘇松爲最，嘉湖次之。杭又次之。洪武十二年，命戶部裁減其額，而

當時蘇州一府秋糧歲額猶與浙江通省埒至是下詔減免每畝不得過一斗。

夏四月李景隆及棣戰於白溝河敗績復奔德州。

時大軍六十萬列陣河上棣率將士馳入陣都督瞿能奮擊所向披靡棣以三騎宵遁迷失道下馬伏地視河流辨東西始知營壘所在明日再戰瞿能平安擣房寬陣敗之景隆繞出棣後大戰良久棣三易馬矢盡揮劍劍折阻於隄幾為瞿能所獲走登隄佯引鞭招後繼者景隆疑有伏不敢前高煦救至棣乃得免薄暮再戰能父子及諸將俞通淵滕聚等俱死失精兵萬餘郭英潰而西景隆潰而南盡棄其所賜璽書斧鉞走德州。

五月棣陷德州進攻濟南。

燕兵乘勝進攻德州未至景隆先奔燕兵入城得糧儲百餘萬石勢益張叅政鐵鉉趨濟南偕都督盛庸等誓以死守景隆往依之燕兵遂攻濟南景隆敗績於城下南走帝用齊泰黃子澄計遣使議和以緩之棣不聽射書城中諭降鉉遣千人出城詐降伏壯士城上候棣入下鐵板擊之別設伏斷橋旣而軍士失約棣未入城板驟下棣驚走橋倉卒不可斷棣鞭馬馳去憤甚築長圍晝夜攻。

秋八月承天門災。

方孝孺建議改謹身殿爲正心殿午門爲端門端門爲

應門承天門爲臯門前門爲路門從之

都督盛庸參政鐵鉉擊敗棣兵於濟南復德州

時平安營單家橋謀出御河奪燕餉舟又選水卒五千人渡河攻德州鉉與庸乘夜出兵掩擊燕衆大敗解圍去鉉等乘勝復德州帝聞擢鉉山東布政使參贊軍務尋進兵部尙書封盛庸歷城侯拜平燕將軍於是庸進駐德州吳傑平安守定州徐凱屯滄州相犄角以困北平

九月詔錄洪武功臣罪廢者後。○冬十月詔李景隆還赦不誅

御史大夫陳子寧宗人府經歷宋徵御史葉希賢並言

景隆失律喪師懷二心宜誅黃子澄亦請正其罪以謝天下皆不聽子澄拊膺曰大事去矣薦景隆誤國萬死不足贖罪

十二月盛庸大敗棣於東昌斬其將張王棣遁還

先是棣襲滄州譚淵一夜殺降卒三千餘人棣自長蘆渡河至德州遣人至城下招盛庸庸堅壁不出燕兵掠臨清大名越汶上至濟寧庸與鐵鉉屯兵東昌以邀之棣率兵薄營庸開陣縱棣入圍之數重斬其驍將張王已而朱能帥番騎來救殊死鬪翼棣潰圍出以百騎走館陶引還北平庸軍勢大振自燕人犯順轉鬪兩年鋒銳甚至失大將燕軍奪氣其後定計南下皆由徐沛

巳辛

不敢復道山東。

三年春正月復齊秦黃子澄官。

以東昌捷告太廟命秦子澄任職如故。

三月盛庸敗棣於夾河斬其將譚淵復戰敗績。

棣復率眾南出保定盛庸營夾河棣將輕騎來覘掠陣過庸遣千騎追之斬其將譚淵燕軍大挫而朱能張武等殊死鬪棣自以鐵騎貫陣與能合官軍失利日暮各歛兵棣以十餘騎逼庸營野宿及明起視已在圍中乃從容引馬鳴角穿營而去庸諸將皆以帝有詔毋使朕負殺叔父名倉卒相顧愕眙不敢發一矢明日復戰庸大敗走還德州時吳傑平安自真定引軍來會與賊引

遠棣以計誘之出戰傑安列陣滹沱河南棣率驍騎循

河繞出陣後安發強弩射燕兵矢集棣旗如蝟毛死者

甚眾忽大風拔樹聲如雷安亦敗仍走入真定

貶齊秦黃子澄諭棣罷兵棣不奉詔

帝聞庸軍敗大懼詔竄秦子澄於外密令為募兵計棣

聞二人已竄上書請罷盛庸吳傑平安兵帝以問方孝

孺孝孺曰燕兵久頓大名天暑雨當不戰自疲急令遼

東諸將入山海關攻永平真定諸將度蘆溝搗北平彼

必歸救我以大兵躡其後可成擒也今其奏事適至宜

且與報書往返踰月使彼將士心懈我謀定勢合進而

蹴之不難矣帝以為然遣使赦燕罪令罷兵歸藩棣不

奉詔未幾盛庸吳傑平安分兵斷燕餉道。棣患之復遣使上書伸前請。帝將許之。孝孺曰：兵罷不可復聚。願毋爲所惑。帝乃下其使於獄以絕燕。

夏六月。棣將李遠寇沛縣。焚糧艘。

官軍駐德州。資糧皆道徐沛。棣遣李遠以輕兵六千詐爲官軍袍鎧。由濟寧至沛。焚糧艘數萬。河水盡熱。魚鼈皆浮死。盛庸遣都督袁宇帥三萬騎追之。爲遠伏兵所敗。

秋七月。都督僉事平安攻北平。不克。

燕兵掠彰德。陷林縣。安在真定。度北平空虛。帥萬騎攻之。棣方軍大名。遣將馳救。安戰不利。引還。時大同守將

房昭引兵入紫荆關。據易州西水寨。以窺北平。棣引兵圍之。都指揮花英等往援。大敗。棣勒兵還北平。

冬十二月。詔駙馬都尉梅殷鎮淮安。

殷尙寧國公主。太祖春秋高。諸王強盛。嘗受密詔輔皇太孫。至是命充總兵官鎮淮安。

棣大舉南犯。

棣稱兵三年。親戰陣。冒矢石。屢瀕於危。所陷城邑。兵去旋復爲朝廷守。故不敢決意南下。無何。有以中官奉使侵暴爲言者。詔所在有司繫治。於是中官密遣人赴燕。具言京師空虛。可取。狀棣慨然曰：頻年用兵。何時已乎。要當臨江一決。不復返顧矣。遂大出兵。明年春。連陷山



輕

東州郡斷徐州餉道破蕭浦及宿州。

四年春正月命魏國公徐輝祖帥師禦棣兵於山東。夏四月官軍連敗棣兵於淮北尋召輝祖還。

棣軍小河都督何福擊敗之斬其將陳文平安轉戰至北阪幾獲棣番騎王騏躍入陣拔棣去適輝祖來會戰於齊眉山斬其將李斌時王師再捷燕人大懼會帝聞訛言謂燕兵已北召輝祖還福軍遂孤。

五月棣兵渡淮陷揚州。

何福移營靈壁欲持久老燕師而糧運為燕所阻平安分兵往迎棣帥精銳橫擊斷其軍為二福開壁往援俱敗走諸將請移駐淮河就糧夜令軍中間三礮即走翼

日燕兵猝薄壘發三礮軍士爭趨門出燕兵乘之遂大亂人馬墜壕塹俱滿福單騎走安及陳暉等三十七人皆被執盛庸獨引軍而南列戰艦淮南岸燕將邱福朱能自上流潛濟盡奪戰艦渡淮下泗州盱眙棣遂乘勝陷揚州帝遣御史大夫練子寧侍郎黃觀修撰王叔英分道徵兵召齊泰黃子澄還京師方孝孺言事急矣遣人許以割地稽延數日俟募兵漸集然後決戰江上乃遣慶成郡主往燕軍議割地罷兵棣曰吾此來欲得奸臣耳不在土地郡主默然遂辭歸帝命諸將集舟師江上為禦守計兵部右侍郎陳植監戰江上慷慨誓師部將殺之以降。

六月，棟兵渡江，犯京師。谷王穗及李景隆迎降。京師陷，帝不知所終。

盛庸、徐輝祖等敗棟兵於浦子海口。會高煦引番騎來援，庸軍退，駐高資港。都督僉事陳瑄以舟師叛，附於棟。棟率兵自瓜州渡江，庸敗走。鎮江守將童俊率眾降。帝命諸王分守都城，遣景隆及兵部尚書茹瑺、都督王佐詣燕師講和。棟曰：「吾無罪而削為庶人，今救死，何以地為？」景隆等不能發一語，遽還。帝復令谷王穗、安王楹往。棟卒不奉詔，進兵屯金川門。左都督徐增壽謀內應，帝手劍斬之。穗、景隆守金川門，登城望見棟麾蓋，開門迎降。御史連楹叩馬欲刺棟，被殺。都城中火起，帝不知所終。棟遣中使出后屍於火，詭云：「帝屍。」越八日，用王景言以天子禮葬之。

棟自立為皇帝。

棟入京，編修楊榮迎謁，馬首曰：「殿下先謁陵乎？」先即位。平。棟遽趣謁陵畢，群臣備法駕迎詣奉天殿，即皇帝位。

削魏國公徐輝祖爵。

輝祖當燕師渡江，猶引兵力戰。京師陷，諸武臣咸迎附。勸進，輝祖獨守父祠。於是下吏命引罪，不屈。削爵幽私第。永樂五年卒。至萬曆時，追諡忠貞。

殺兵部尚書齊泰、太常卿黃子澄、文學博士方孝孺，皆夷其族，坐黨死者數百人。

初帝發北平。姚廣孝以孝孺爲囑曰。城下之日。彼必不降。幸勿殺之。殺孝孺。天下讀書種子絕矣。帝領之。及陷京師。卽大索孝孺等五十餘人。至是縛孝孺至。令草登極詔。孝孺悲慟。聲徹殿陛。帝降榻勞曰。先生無自苦。朕欲法周公輔成王耳。孝孺曰。成王安在。帝曰。彼自焚死。曰。何不立成王之子。帝曰。國賴長君。曰。何不立成王之弟。帝曰。此朕家事。顧左右授筆札。孝孺投筆於地。哭且罵。復強之。乃大書燕賊篡位四字。帝怒。命繫獄。泰。子澄亦至。帝親詰之。抗辨不屈。遂命與孝孺同磔於市。孝孺門人廖鏞。廖銘。檢遺骸。瘞聚寶門外山上。泰從兄弟俱坐死。子澄族人無少長皆斬。孝孺弟孝友亦死。妻鄭氏及二子中憲。中愈。先自經。一女投秦淮河。宗族親友及門下士。坐誅者數百人。

殺御史大夫練子寧。戶部侍郎卓敬。夷其族。

縛子寧至。語不遜。磔死。族其家。姻戚俱戍邊。敬嘗建議徙燕。帝責以離間骨肉。猶憐其才。命繫獄。使人諷以管仲。魏徵事。敬曰。人臣委質。有死無二。先皇帝曾無過舉。一旦橫行篡奪。恨不卽死見故君地下。乃更欲臣我耶。姚廣孝故與敬有隙。進曰。敬言誠見用。上寧有今日。乃斬之。夷三族。同時殉難者。宗人府丞宋徵。御史葉希賢。衡府紀善周是修。修撰王長良。於城陷前一日。與胡廣。解縉。俱集吳溥舍。縉陳說大義。廣亦奮激慷慨。良獨流

涕不言。二人去。溥子與弼嘆曰：胡叔能死，是最佳事。溥曰：不然。獨王叔死耳。語未畢，隔牆聞廣呼家人，謹視豚。溥顧與弼曰：一豚尚不能舍，肯舍生乎？須臾，良舍哭飲。鳩死矣。時先後死者：副都御史茅大芳、僉都御史周璿、程本立、司中刑部尚書暴昭、戶部侍郎郭任、盧迴、禮部侍郎黃魁、給事中陳繼之、韓永、龔泰、黃敏、御史謝昇、丁志方、甘霖、董鏞、魏冕、林英、曾鳳詔、戶部主事巨敬、大理寺丞鄒瑾、秦府長史鄒朴、右侍郎黃觀。當靖難兵起時，觀嘗草制，諷其散軍歸藩，束身謝罪，辭極詆斥。及奉詔募兵，至安慶，聞京師陷，命舟至羅刹磯，朝服東向拜，投急湍死。妻翁氏攜二女及家屬十人，投淮清橋下死。修撰王叔英、刑部尚書侯泰、禮部尚書陳迪、大理少卿胡閏、左拾遺戴德彝、蘇州知府姚善、徽州知府陳彥回、樂平知縣張彥方、漳州教授陳思賢、松江同知周繼瑜，並不屈死。御史高翔喪服八見，語不遜，族之。發其先家親黨悉戍邊。高氏產皆加稅。曰：令世世罵翔也。谷王府長史劉璟，誠意伯基次子也。嘗至燕，與王奕。王曰：不稍讓。我耶？對曰：不可讓者，不敢讓也。王默然。燕兵起，隨谷王歸京師。獻十六策，不聽。命叅李景隆軍事。軍敗，歸青田。帝卽位，召之以疾辭。逮入京，猶稱殿。下。且云：殿下百世後，逃不得一篡字。下獄，自經死。浙江按察使王良，前爲刑部侍郎，以議減燕府人罪，謫外。至是，遣使召良。良積

薪自焚妻赴水死仍徙其家於邊  
秋七月革建文年號

遷興宗孝康皇帝主於陵園仍稱懿文太子太后呂氏  
仍稱太子妃以今年爲洪武三十五年明年爲永樂元  
年建文中更改諸法一復舊制被兵州縣復徭役三年  
蠲天下今年田租之半

召陳瑛爲左副都御史

建文初瑛爲北平按察使受燕府金錢通密謀僉事湯  
宗白於朝逮謫廣西至是召爲副都御史署院事瑛天  
性殘忍受寵任益務深刻言廷臣劾死建文者如黃觀  
廖昇王叔英周是修王良顏伯瑋輩其心與叛逆等請  
追戮之帝不聽後瑛闕方孝孺等獄詞遂簿觀叔英等  
家疏族外親莫不連染胡閏之獄所籍數百家號冤聲  
徹天兩列御史皆掩泣瑛謂人曰不以叛逆處此輩則  
吾等爲無名於是諸忠臣無遺種矣

八月以侍讀解縉編修黃淮入直文淵閣侍讀胡廣修撰  
楊榮編修楊士奇檢討金幼孜胡儼同入直預機務

縉在建文中官翰林待詔帝卽位擢侍讀與淮常立御  
榻左備顧問或至夜分帝就寢猶賜坐榻前語機密至  
是命七人同入直預機務內閣預機務自此始

殺兵部尙書鐵鉉御史大夫景清夷其族  
初燕兵渡江鉉屯淮上師亦潰至是執之至反背坐廷

中令其一回顧終不可遂磔於市。清倜儻尙大節。燕師入。諸臣死者甚衆。清獨委蛇班行。人怪之。一日早朝。衣緋懷刃入。先是欽天監奏異星赤色。犯帝座甚急。帝故疑清及朝。搜得所藏刃。詰責之。清奮起曰。欲爲故主報讐耳。遂磔於市。族之。籍其鄉。轉相攀染。謂之瓜蔓抄。村里爲墟。

九月論靖難功爵賞有差。

封邱福等三十四人爲公侯伯。

冬十月重修太祖實錄。

命李景隆爲監修官。前纂修官知府葉惠仲以直書靖難事。族誅。

十一月立妃徐氏爲皇后。

癸

成祖文皇帝永樂元年春正月。命周齊代岷四王復其國。

諸王者。惠帝時廢。帝初卽位。復其爵。至是予舊封。

二月。改北平爲順天府。置北京。徙寧王權於南昌。

初。權之被誘入關也。帝許以事成。分天下。及卽位。留之京師。時大寧殘廢。已無可歸。乃乞改南土。請蘇州及錢塘。皆不許。封之南昌。已而有告權巫蠱誹謗者。密探無驗。得已。權自是日韜晦。構精廬一區。讀書鼓琴。其間終帝之世。得無患。

三日。命平江伯陳瑄等督海運。餉北京遼東。

洪武中。靖海侯吳禎等先後督江浙邊海衛軍。歲轉遼

餉至三十年。以遼餉贏羨罷海運。及是北方軍儲不足。乃命瑄與都督僉事宣信帥舟師。由海道運糧四十九萬石。餉北京遼東。自是歲以爲常。徙大寧都司於保定。

自是北邊失一重鎮。至天順末。大寧地遂爲朶顏三衛所有。遼東宣府聲援隔絕。而諸夷部落胥列門庭矣。夏四所。命戶部尚書夏原吉浚吳淞江。

時蘇松嘉湖數郡。頻年水災。命原吉治之。原吉請疏吳淞南北兩岸。安亭等浦。引太湖諸水入劉家白茆二港。使其勢分。以復禹貢三江入海之舊。帝從之。命發民夫開濬。原吉晝夜經理。以身先之。功遂成。

遣中官侯顯等使外域。

帝聞烏斯藏僧哈立麻善幻化。欲致一見。因通迤西諸番。命顯賚書幣往。選壯士健馬護行。未幾。又遣馬彬使瓜哇。蘇門答刺諸國。李興使暹羅。尹慶使滿加刺。柯枝諸國。中官四出。及三年。夏帝疑惠帝亡海外。使中官鄭和王景弘等。蹤跡之多。賚金幣。率兵二萬七千餘人。造大舶。由蘇州劉家港入海。歷福建。達古城。以次遍歷西洋。耀兵絕域。諸邦震恐。來朝者日衆。而中國耗費亦不貲。

秋八月。徙富民實北京。

時發流罪以下墾北京田。又徙直隸蘇州等十郡。浙江



等九省富民實之

削歷城侯盛庸爵尋自殺

帝初命庸鎮淮安旋移山東庸常不自安陳瑛誣以心懷異謀遂削其爵庸自殺

冬十一月頒大統歷於朝鮮諸國○北京地震○封胡查為安南國王

惠帝時黎季犛弑國王陳日焜立其子頤及弟突復弑之而篡其位更名曰胡一元名其子蒼曰胡查尋自稱太上皇傳位於查朝廷不知也帝初踐阼查遣使奉表朝貢詭言安南王陳氏嗣絕臣為眾所推乞賜封爵帝遣使齎勅諭其陪臣耆老詢以陳氏繼嗣有無及推立

誠偽查隨遣使還奏遂詔封查未幾安南舊臣裴伯耆詣闕告難明年前國王日痊弟陳天平來奔請兵復讐帝始悔封查之誤遣使詰責令具篡奪之狀以聞查復遣使謝罪請迎天平歸國帝信之三年冬遣都督僉事黃中呂毅以兵納天平於安南至芹踰山徑險惡伏兵起劫殺天平中等不得已引還帝大怒銳意興師勅中等隨軍立功自贖

甲  
二年夏四月立子高熾為皇太子封高煦為漢王高燾為趙王

帝初起兵高煦常從戰有功帝喜以為類己高煦亦以此自負謀奪嫡及議建儲邱福等言高煦有功宜立獨





金忠持不可。帝召解縉問之。縉稱皇長子仁孝。天下歸心。帝不應。縉又頓首曰。好聖孫。謂宣宗也。復問黃淮。尹昌隆對與縉同。帝意乃決。

以僧道衍爲太子少師。

道衍從帝藩邸。定策起兵。戰守機事皆決焉。帝用兵有天下。道衍力爲多。論功第一。至是拜資善大夫。太子少師。復姚氏姓。賜名廣孝。帝與語呼爲少師。而不名。常居僧寺。退朝仍緇衣。帝往來兩都。出塞北征。留輔太子於南京。皇長孫出閣就學。又侍說書。

六月。汰冗官。封哈密安克帖木兒爲忠順王。

哈密漢伊吾盧地。元末以威武王納忽里鎮之。卒弟安

克帖木兒嗣。帝卽位。遣使招諭。遂入貢。詔封忠順王。明年卒。命其兄子脫脫襲封。

秋九月。以胡儼爲國子祭酒。

儼在閣承顧問。嘗不欲先人。然少憚。帝以爲祭酒。遂不預機務。

冬十月。籍長興侯耿炳文家。炳文自殺。

刑部尙書鄭賜都御史陳瑛劾炳文衣服器皿有龍鳳飾。王帶用紅鞋僭妄不道。詔籍其家。炳文遂自殺。

十一月。京師地震。十二月。李景隆有罪削爵。

初。景隆以迎降功。加太子太師。授左柱國。朝廷有大事。景隆以班首主議。諸臣皆不平。周王首發其建文時至

邸受賕事。廷臣復劾其與弟增枝謀逆有狀。詔削勳號。絕朝請。至是李至剛復言其居家不道事。遂奪爵。錮私第。籍其家。

三年春正月。韃靼掃胡兒內屬。

鬼力赤稱可汗。帝遣使諭之通好。賜銀幣并及其知院阿魯台等。至是阿魯台別部掃胡兒及察罕達魯花等先後來歸。

二月。命趙王高燧居守北京。○夏六月。遣中官山壽帥師出雲州。

時命武城侯王聰覘虜兵別遣山壽帥騎兵出雲州。北行會之。人齎一月糧每三十里置五騎以待馳報。宦者

典兵自此始。

冬十月。殺駙馬都尉梅殷。

初殷守淮安。悉力防禦。帝遣使假道。殷不許。帝卽位。殷尙擁兵淮上。帝迫公主齧血爲書。招之。殷得書慟哭。乃還京。旣入見帝。曰。駙馬勞苦。對曰。勞而無功。徒自愧耳。帝默然。二年。陳瑛奏殷祝詛畜養亡命。帝命執殷家人。送遼東。至是都督潭深指揮趙曦擠殷死橋下。以殷自投水聞。公主牽帝衣大哭。帝歸罪深。曦斬之。官殷二子。十二月。沐晟討八百降之。

四年春三月。帝視國子監。行釋奠禮。○置開原廣寧馬市。設馬市三。一在開原南關。以待海西。一在開原城東。一

丙戌

在廣寧以待朶顏三衛既而城東廣寧市皆廢惟南關市獨存。

夏四月詔求遺書。六月朔日食不見。秋七月以成國公朱能為征夷將軍帥師討安南。

帝大發兵討安南命能為征夷將軍沐晟張輔副之師十八將軍分道進詔之曰安南皆朕赤子惟黎季犛父子首惡必誅他脅從者勿治罪人既得當擇陳氏子孫賢者立之。

閏月營北京宮殿。

以秦寧侯陳珪董其役宥雜犯死罪以下令輸作命大臣往川湖各省採大木佐一三至十八年冬郊廟宮殿始成。

八月齊王博有罪廢為庶人。

博性凶暴復國後益驕縱帝賜書戒之不悛五月博入朝廷臣劾博罪博厲聲曰奸臣喋喋又欲效建文時耶會盡斬此輩帝聞之怒留之京邸削官屬護衛及是召其子至並廢為庶人。

冬十月朱能卒於軍詔以張輔代之。十一月高文雅上書言事詔授以官。

先是進政使受四方章奏非重務不以聞帝知之詔旨切責至是戶部人材高文雅上書言時政首舉建文事次及救荒卹民陳瑛劾其狂妄請罪之帝曰草野之人

不知忌諱言苟可採勿以直而廢之命吏部量授文雅官。

十二月赦。○張輔大破安南兵。

安南有東西二都。依宜洮沱富良四江爲固。賊緣江兩岸樹柵築城於多邦隘。連亘九百餘里。輔軍次富良江。遣將破賊於嘉林江。遂與沐晟合軍。進攻多邦城。夜四鼓。令軍士人持炬火銅角。越重濠雲梯。傳其城。指揮蔡福先登。士蟻附而上。角鳴。萬炬齊舉。遂入城。賊驅象迎戰。輔以畫獅蒙馬衝之。翼以神機火器。象皆反走。賊大潰。遂克東都。遣別將李彬克西都。三江州縣皆望風降。賊遁入海。明年春。輔又大破之於木九江。斬三萬餘級。

甌寧王允熙卒。

惠帝弟凡三人。吳王允燿。衡王允燧。徐王允熙。帝卽位。後廢允燿。允燧爲庶人。改封允熙爲甌寧王。至是邸中火。王暴卒。

五年春二月。謫解縉爲廣西參議。

縉建議立太子。語稍稍傳外庭。高煦深怨之。譖縉洩禁中語。帝怒。遽出縉。

三月。封西僧哈立麻爲大寶法王。

前年冬。侯顯偕哈立麻至。帝令建齋於靈谷寺。爲高帝高后薦福。或言卿雲甘露青鳥白象之屬。連日畢見。帝大喜。侍臣多獻賦頌。乃封哈立麻萬行具足十方最勝。

圓覺妙智。慧善普應。祐國演教。如來大寶法王。西天大善自在佛。領天下釋教。賜印誥。其徒三人。亦封灌頂大國師。

夏四月。皇長孫瞻基出閣就學。○五月。張輔禽黎季犛。及其子蒼。送京師。

賊入富良江。輔與沐晟夾岸迎戰。都督柳升等以舟師橫擊。大破之。時久晴。水涸。賊棄舟走。官軍至驟雨。水漲數尺。遂畢渡。至奇羅海口。獲季犛及其子蒼。檻送京師。安南平。論功。進輔為英國公。晟為黔國公。餘陞賞有差。六月。置交趾布政司。以行部尚書黃福領布按二司事。分十七府。四十七州。百五十七縣。十二衛。置三司。以尚

書黃福兼掌布按二司事。呂毅掌都司。黃中副之。以丁鈺為刑科給事中。

時嚴誹謗之禁。山陽民丁鈺。訐其鄉人誹謗。得罪者數十人。法司迎上旨。言鈺才可用。立命為給事中。

秋七月。皇后徐氏崩。○冬十一月。彗星見。

六年。春正月。岷王榷有罪。削其官屬。○夏五月。京師地震。○秋八月。交趾復亂。

大軍之討黎氏也。陳氏故官簡定先降。將遣詣京師。復逸去。餘寇附之。定乃僭號稱大越。出沒化州山中。大軍還。即出攻鹹子關。帝命沐晟以兵四萬討之。至冬。晟與簡定戰於生厥江。敗績。參贊尚書劉儁被圍。自經。呂毅

及叅政劉昱皆死。明年復命張輔、王友帥師與晟協勦。簡定自稱上皇，立陳季擴為帝，賊勢益張。

九月詔理獄囚。

科臣劾刑部都察院淹禁罪囚，瘐死者衆。帝召尙書呂震等切責，期三日內悉疏雜犯死罪以下囚。

紀

七年春正月申茶禁。

洪武中以茶易馬，上馬給茶八十斤，中下以次減之。帝初年招徠遠人，遞增其數，至是碭門茶馬司至用茶八萬餘斤，僅易馬七十匹，且多瘦損，乃申嚴茶禁，增設茶馬司。後又特遣御史巡督。

二月帝北巡，命皇太子監國。

詔文武除拜，邊軍調發，上請行在。自餘常務悉啓太子處分，命吏部尙書蹇義、兵部尙書金忠、右春坊大學士黃淮、左諭德楊士奇輔太子監國。時御史袁綱、瑄珩黨附陳瑛，陷兵部主事李貞。太子察其寃，立白之。以帝方寵瑛，故特宥瑛，而下綱珩於獄。又御史方恢匿父喪，太子令械送行在。於是人皆服用法之當。

忠誠伯茹瑄下獄死。

瑄以首勸進，封忠誠伯，坐不送趙王遣歸里。既復逮至京，得釋。還過長沙，不謁谷王。王以為言，時方重藩王禮，谷王又開金川門有功，帝意嚮之，遂逮瑄，下錦衣衛獄。瑄知不免，服毒死。

三月都督僉事平安自殺。

初惠帝討燕安以列將從驍勇善戰功最多已而兵敗被執送北平帝卽位累進後軍都督僉事及是帝覽章奏見安名曰平安尙在耶安聞遂自殺

夏閏四月詔重罪皆五覆奏。○五月封瓦刺馬哈木爲順寧王太平爲賢義王把禿孛羅爲安樂王

瓦刺亦蒙古部落在韃靼西其渠分爲三帝卽位屢遣使諭賜至是遣拔答失等來貢馬仍請封遂封三人皆金珠光祿大夫加土號自是歲一朝貢

遣給事中郭驥使鞏靼爲所殺

鞏靼知院阿魯台殺鬼力赤而迎元裔本雅失里本雅失里失八里立爲可汗帝以書諭之不聽命至是復遣驥往本雅失里殺之

詔御史勿復用吏

帝以御史爲朝廷耳目之寄宜用有學識達治體者詔自今勿復用吏黜洪秉等四人爲序班

秋七月以邱福爲征虜大將軍帥師征韃靼敗績

帝以福爲大將軍王聰火真副之將精騎十萬北討時本雅失里已爲瓦刺所襲破與阿魯台徙居臚朐河福帥千騎先馳遇游兵擊敗之遂渡河獲其尙書一人言本雅失里聞大兵至惶恐北走去此可三十里福大喜曰當疾馳禽之諸將請俟諸軍集偵虛實然後進福不

從師衆直薄敵營戰二日每戰敵輒伴敗引去福銳意  
乘之敵衆奄至圍之數重聰戰死福等皆被殺全軍盡  
沒

九月朔日食○冬十一月張輔討交趾破之獲簡定

輔進師鹹子關縱火焚賊舟追至太平海口大破之遂  
自黃江入神投海獲簡定於美良山中及其黨送京師  
皆伏誅惟陳季擴遁去帝留沐晟討之召輔還

始令中官刺事

太祖制內官甚嚴及帝起兵逼江北內臣多逃入其軍  
漏朝廷虛實帝以爲忠於己卽位後遂加委任凡明世  
宦官出使典軍分鎮刺事諸大權皆帝啓之也

皇明通志卷之三十一



